



Quoniam Statuta Academiæ summis rogata Auspiciis, gravissimis sancita poenis, & Inviolandis jurisjurandi firmata nexibus, repetitas subinde Tabulas (veluti pedanei alicujus Judicis edicta) nullatenus desiderant: Cum tamen inclinatis moribus & languente disciplinâ, inveterata mala sibi met-ipsis in Auctoramentum cessere, & Nos insuper Animo nostro statuimus, ut deinceps Peccaturis nullus in posterum relinquatur veniæ locus: æquû duximus ut nec excusationis ansa iisdem relicta habeatur. Quare hoc Programme monere placuit, firmiterque injungere,

Ut Exercitia Academica, & præsertim Quadragesimalia sobriè, modeste, & pacatè peragantur; ne quis rixis & clamoribus, multo minùs tumultu & pugnis eadem obeat. Ut nemo lites inter partes, siue personæ sint singulares & privatae, siue etiam communitates & Collegia foveat aut disseminet. proinde nequis vel dictis, aut scripto qualicunque ad disputandum provocet; aut laceffitus certaminis conditionem admittat: nec provocantem aut provocantes celet, sed è contra quàm citissimè Vice-Cancellario deferat.

Insuper ne ulli in Scholarum porticibus aut areâ, nec etiam Urbis plateis otiosi permanent, aut Catervatim Congregentur. Vel Domus Convocationis, aut apodyterii liminibus insistere, aut eadem nisi ex causa legitimâ ingredi præsumant. Quinimò nec cenopolia aut Popinas post finitas disputationes adeant. Nec Deponentes, Moderatores aut Opponentes Epulis excipiant, aut ad potandum invitent. Neque in solenni processu (quod fieri amat) inconditis vocibus, & insano ululatu præsentandos prosequantur. Nec quisquam, ab Exercitia præstituto aut Gradum ambiente, Honorarii, vel perpotationis nomine, seu quocunque alio prætextu nummos deposcat; nec Exercitia præstaturus, gradumve ambiens, eidem donet vel tribuat.

Demum nequis Universitatis Officiarius aut Minister, pecuniam aliquam à quocunque petat, exigat, aut accipiat, (nisi quæ per Feudorum tabellam debita est.) Qui verò ita interpellatus fuerit, caveat ne quicquam solvat aut elargiatur.

Si quid in prædictis (aut alio quocunque consimilis notæ) delinquatur, pro facti merito & atrocitate, per multam pecuniariam, Gradus dilationem aut jacturam, Exercitiorum irrogationem, Aut demum Incarcerationem, Bannitionemve vindicabitur.

Et siquidem pro Comperto habetur facilem veniam novis tantum delictis aperire aditum, & crudelissimâ lenitate gravioribus Exemplis materiam suppeditare; Sanctè profiteamur, & solennitè denunciamus neminem quacunque de Causâ pænæ subiectum; prece, querelis, simulatâ pænitentia, vel etiam Amicorum patrocínio aut intercessione, Noxæ eximendum fore; aut postliminii jure in integrum restituendum.

Quoniam verò disputationes in Parvise ter quavis hebdomadâ in pleno Terminò habendæ, per summam negligentiam subindè intermittuntur, quod ex inde natum videtur, quia exercitia ista pro formâ præstaturi, Magistros Scholarum desultoriè, & incertis temporibus adeunt; ita ut promptum non sit cognoscere, utrum (iis deficientibus) pro Terminò disputaturos subrogare opus sit: ut huic incommodo occurratur; monemus omnes et singulos, quorum hæc interesse possunt, ut secundum Statutorum exigentiam, & sub poenis ab iisdem impositis: *Responsuri pro formâ Septimanâ præcedente disputationem suam, nomina sua, & quæstiones de quibus responsuri sunt; die Mercurii & Saturni statim post finitas disputationes in Augustinensibus Magistro Scholarum sub ipsius Chirographo approbandas exhibeant: Responsuri verò primâ Septimanâ cujuslibet Terminî, ante octo dies Magistro Scholarum illâ Hebdomadâ moderaturo in Augustinensibus, nomina sua, & quæstiones similiter approbandas exhibeant; Ut sic, si nulli apud Magistrum Scholarum de seipsis fuerint professi; Ille protenus, tres simpliciter seniores anni quartî, & sic deinceps; ut pro Terminò, disputationes illas peragant, admonendos, procuret.*

Dat. Feb. 16.
A^o 1666.

IOHAN: FELL Universit:
Oxon, Vice-Can.